

**qemati a Cemas tua kana nemanemanga.**

**1** ka patagil a **Cemas** a qemati tua kalevelevan katua kacauan, <sup>2</sup>a i kacauan namaqaluvu saka nekanan nu nemanema. a inu tu nazuanga tua kacauan lavek sakamaya, a namiseleman a neka nu telar; lakua a kate piculan a **Vavak** nua **Cemas** i taivavaw tua zalum a palavalavak. <sup>3</sup>“ula izua a telar!” kaya **Cemas** a qivu, izuanga a telar. <sup>4</sup>paka nanguaq a **Cemas** tua telar, sa peneti a papartimali a telar katua selemanan. <sup>5</sup>a telar pinaka muqadadaw, a selemanan pinaka qezemezemet. cemalivat a qezemezemet, sa kalia. aicu mavan a kinudan nua **Cemas** tua sika 1 qadaw.

<sup>6-7</sup>“ula izua kalevelevan a patatukuda tua zalum i teku katua i vavaw!” kaya uta a **Cemas** a pazazekat, maitazua mapasusu. maitazua **Cemas** a qemati tua kalevelevan a patatukuda tua zalum i taivavaw katua i taiteku. <sup>8</sup>azua sinipatatideq pinaka kalevelevan. cemalivat a qezemezemet, sa kalia. aicu mavan a sika 2 qadaw.

<sup>9</sup>“ula matevetevel a mapataita a zalum i taiteku tua kalevelevan, ula mapacun a qipu!” kaya **Cemas** a pazazekat, maitazua mapasusu. <sup>10</sup>azua namapacun a qipu pinaka kadunungan, azua namapataita zalum pinaka lavek. paka nanguaq a **Cemas** tua qinati nimađu a kadunungan katua lavek. <sup>11</sup>“ula cemuvuq a kemasi kadunungan a martimalimali a cemel katua kasiw, a mavan a venavat katua venangavangal!” kaya **Cemas** a pazazekat, maitazua mapasusu. <sup>12</sup>sa kirimu a veneve a kemasi kadunungan a martimalimali a cemel katua kasiw. paka nanguaq a **Cemas** taicu a marka qinati nimađu. <sup>13</sup>cemalivat a qezemezemet, sa kalia. aicu mavan a sika 3 a qadaw.

14“a i kalevelevan ula izua marka telar a papartimali tua muqadadaw katua qezemezemet, a pukelang tua cavi, tua qadaw, katua kalavevean kalazalangzangan kalauragan kalalaleqelan, 15saka patelar uta tua kadunangan a kemasi kalevelevan!” kaya **Cemas** a pazazekat, maitazua mapasusu. 16pai qemati a **Cemas** tua telar a 2: a qadaw a kisan paqulaqula nu muqadadaw; katua qilas a paqulaqula nu qezemezemet. qemati uta tua marka vituqan. 17sa pizua-i i kalevelevan, a paqula tua kadunangan, 18a uri kilalaing (kemareng) tua kacauan nu muqadadaw nu qezemezemet, a papartimali tua qulalan katua namiseleman. paka nanguaq a **Cemas** tua qinati nimadu a telar. 19cemalivat a qezemezemet, sa kalia. aicu mavan a sika 4 a qadaw.

20“ula maudal a maka zalualum a martimalimali a qemuzimuzip; ula maudal a marka qayaqayam!” aya pazazekat a **Cemas**. 21qau qemati a **Cemas** tua qemuzimuzip a martimalimali, a maka zalualum, katua maka vavavavaw a marka qayaqayam. paka nanguaq a **Cemas** taicu a qinati nimadu a penulat. 22kisenayan nua **Cemas** azua marka qemuzimuzip, sa pazazekati a maka zalualum a marka ciqaw tu maudal a pulingelinget tua lavek; sa pazazekati a marka qayaqayam tu maudal i kacauan. 23cemalivat a qezemezemet, sa kalia. aicu mavan a sika 5 a qadaw.

24“a i kadunangan ula maudal a martimalimali a qemuzimuzip, a paquziquzipen, a maka cemcemcemel katua marka qatuvituvi!” kaya **Cemas** a pazazekat, maitazua mapasusu. 25pai qatin nua **Cemas** a marka qemuzimuzip a penulat i kacauan. paka nanguaq a **Cemas** taicu a qinati nimadu a penulat.

26pitaivilil taicu, qivu a **Cemas** a mayatucu: “ uri pakiamaw iten tua ta kinakemudamudan a qemati tua uri nakiparu titen a caucau. uri ku pakarengen timadu tua marka ciqaw, tua marka qayaqayam, katua qemuzimuzip a paquziquzipen, a maka cemcemcemel, katua marka qatuvituvi a penulat,” aya. 27pai qemati anga **Cemas** tua caucau a uqalai katua vavayan a pakiamaw

tua kinakemudamudan nimadu; <sup>28</sup>sa kisena-i tiamadu a mayatucu: “ula mun a pualak a pakaliaw, ula sepulingelinget a nu alak a nu taivilivilil tua i kacauan a palavak. ayatua uri ku paparangezan mun tu kemareng tua marka ciqaw, qayaqayam katua marka qemuzimuzip a penulat. <sup>29</sup>ku sinipadele anga mun tua martimalimali a lami katua vangal nua kasiw tu uri nu sika valut. <sup>30</sup>qau a marka qemuzimuzip katua qayaqayam a penulat, ku sinipadele anga tua cemel katua veve nua kasiw,” kaya **Cemas**, maitazua mapasusu. <sup>31</sup>paka nanguaq aravac a **Cemas** tua marka qinati nimadu a mapacucun a penulat. cemalivat a qezemezemet, sa kalia. aicu mavan a sika 6 a qadaw.

**2** a qinati nua **Cemas** a kana nemanemanga i kalevelevan katua i kacauan, namaqacuvung anga. <sup>2</sup>ka sika 7 a qadaw, patezua a **Cemas** tua qemati, ayatua maqacuvung anga a sengsengan nimadu. <sup>3</sup>pai san nanguaqen nua **Cemas** azua sipaka 7 a qadaw, sa peneti a seman paravac; ayatua tuazua qadaw, mavan a qinacuvungan nua **Cemas** a qemati, sa patezua tua sengsengan. <sup>4</sup>aicu a sinivecik i maza, pasemalaw tua vinqacan nua **Cemas** tua kalevelevan katua i kacauan.

### quma (puraveran) i idin.

pai ka venqac a **Cemas** tua kalevelevan katua kacauan, <sup>5</sup>a i kadunungan nekanan nu cemel katua kasiw, nekanan nu nacemuvuq a laceng, ayatua ini anan ka paqudali a kadunungan nua **Cemas**, saka nekanan nu caucau a qemuma; <sup>6</sup>lakua izua zalum a cemevecevud i kadunungan, a temeving tua qipu.

<sup>7</sup>pitaivilil taicu, qemati anga a **Cemas** tua caucau a sema qipu,<sup>(1)</sup> sa dapesi a papunasi a paka tua ngudus nimadu. pai valut anga azua caucau.

<sup>8</sup>san qumain nua **Cemas** azua i pasa kacedas a kadunungan a pinaka i **idin**, sa pasazua-i a qinati nimadu

(1) azua 'caucau' katua 'qipu' aya kai, uri pasa mamaw a lingaw itua hiniberayan.

a caucau. <sup>9</sup>pacuvuqen nimadu a martimalimali a kasiw a nguanguaq, a venangavangal tua sanguaq a kanen. a i vecekadan tua quma izua taqapuluan a kasiw a venangavangal tua sikavalualut. qau izua uta azua kasiw a venangavangal tua makaya papucaquan tua caucau a papartimali tua nanguaq katua nakuya. <sup>10</sup>izua za mataita pana a namaka zua i **idin**, a pazaluzalum tazua quma. qau azua pana vaivaik a pasa taicasaw tua i **idin**, sa kavadavada*i* a masan 4 a pana. <sup>11</sup>azua masan 1 a pana pinaka **pisun**. aicu a pana nakipalingul tua kadunangan i pasa **havila**. <sup>12</sup>azua kadunangan liaw a kakingan, katua namasan pazangal aravac a salulum a cemel, katua kaulayan a qata. <sup>13</sup>azua sika masan 2 a pana pinaka **gihun**. aicu a pana nakipalingul tua kadunangan i pasa **kus**. <sup>14</sup>azua sika masan 3 a pana pinaka **tigeris**, aicu a pana vaivaik a maka tai kacedas tua i pasa **asuria**. azua sika masan 4 a pana pinaka **yuperatis**.

<sup>15</sup>pasazuain i **idin** nua **Cemas** azua caucau, a pakasengseng a pazazaw. <sup>16</sup>pazazekaten nua **Cemas** azua caucau a mayatucu: “a kana vangal nua kasiw a penulat i maza inika makuda su kanen. <sup>17</sup>lakua mayangata a keman tua vangal nuazua kasiw a pinaka venangavangal tua makaya papucaquan tua caucau a papartimali tua nanguaq katua nakuya. ayatua nu keman sun, tara macai sun tuazua qadaw,” ayain.

<sup>18</sup>ka vilil anga, qivu a **Cemas**: “inika nanguaq a sepakacidil azua uqalai; saka uri qemati aken tua macidil a uri sedalep tu salad a pusalad taimadu,” aya. <sup>19</sup>pai a **Cemas** sema qipu a qemati tua marka qemuzimuzip katua qayaqayam, sa ciuri a pasa taiqayaw tazua caucau, tua sipapungadanan nua caucau tua marka qemuzimuzip a penulat. <sup>20</sup>pinapungadanan anga nazua caucau a marka qayaqayam katua qemuzimuzip a penulat. lakua neka nuka ita a nasedalep a masan salad nimadu.

<sup>21</sup>pai pakataqeden nua **Cemas** azua caucau. ka nasekataqed anga timadu, alapan timadu nua **Cemas** tua viduat a semu ita, sa lenguaqi a pacikel a vutul nua

kinacavacavan. <sup>22</sup>qau qatin nua **Cemas** a papere vavayan azua viduat, sa ciuri a pasa ṭaiqayaw tua uqal<sub>ai</sub>. <sup>23</sup>manu qivu azua uqal<sub>ai</sub>:

“aicu paqulid tu ku sika tadalan,  
a ku cuqelal, a ku vutul a paqulid.  
uri ku papungadanan timadu tu vavayan,  
ayatua timadu kinasi tua kinacavacavan nua uqal<sub>ai</sub> a  
qemati,” aya.<sup>(2)</sup>

<sup>24</sup>manasika a uqal<sub>ai</sub> kitukuda tua kama katua kina, sa katevel katua cekel a vavayan, saka azua ma 2 masan 1 anga a kinacavacavan.

<sup>25</sup>azua marcekel namalivunai, lakua inika namasiaq.

### pinasulivayan nua caucau tua pazazekat na Cemas

**3** pai a qatuvi ṭala maligilan anga tua qinati nua **Cemas** a qemuzimuzip a penulat. ti qatuvi kivadaq tua vavayan a mayatucu: “maya keman tua vangal nua kana kasiw anga i maza, aki naya **Cemas** a paqulid a pazazekat ṭanumun?” aya.

<sup>2</sup>tevelain ni vavayan: “a marka vangal nua marka kasiw imaza inika makuda a nia kanen. <sup>3</sup>lakua amin a vangal nazua taqapuluan a kasiw a i vecekadan tusa quma a inika nanguaq a nia kanen. kumali ta kidadas tazua kasiw inika selaing a **Cemas**, saka ki siayanga keman tua vangal. nu inika men a kiplaing, ki men a macai,” ayain.

<sup>4</sup>temvela ti qatuvi: “inika paqulid azua kai, inika mun a uri macai. <sup>5</sup>a siniqativu nua **Cemas** a mayatazua, kemlang timadu tu nu keman mun tazua vangal, uri maru **Cemas** anga mun a macaqu a papartimali tua nanguaq katua nakuya,” aya.

<sup>6</sup>ka pacun azua vavayan tua vangal nazua kasiw tu nateminglai aravac, saka makaya papucaquan, manu kemasi varung timadu a salinga. pai sa cempis tua vangal a keman,

<sup>(2)</sup> azua ‘uqal<sub>ai</sub>’ katua ‘vavayan’ aya kai, uri pasa mamaw a lingaw itua hiniberayan.

sa pava-i uta a cekel a uqalai. manu keman uta timadu tazua vangal. <sup>7</sup>manu ka keman tiamadu, mepuvarung sa kelang tu namalivunai tiamadu. pai malap anga tiamadu tua asaw nua kasiw a iciziku, sa kasengengi a seman kun (tuvil), a kipaselem tua kinacavacavan.

<sup>8</sup>ka uri masulem anga, lelangda tiamadu tu daravaravac a Cemas a maka tua quma. kirimu tiamadu a kiqila a sema tua kasikasiw. <sup>9</sup>pai temautaw a Cemas tazua uqalai a mayatucu: "izainu sun?" ayain.

<sup>10</sup>temvela timadu: "lelangda ken tu daravaravac sun i maza tusa quma. marekut aken, sa ku kiqila; ayatua namalivunai aken," aya.

<sup>11</sup>manu qivu a Cemas a mayatucu: "tima napasemalaw tanusun tu namalivunai sun? manu nakeman anga sun tua vangal nazua kasiw a inika ku siniselaing tu su kanen?" ayain.

<sup>12</sup>temvela azua uqalai: "pakanan aken nua su sinipapusalad tanuaken a vavayan, mana ku sinikan," aya.

<sup>13</sup>pai kivadaqan nua Cemas azua vavayan a mayatucu: "aku sun a maitazua?" ayain.

tevelain ni vavayan: "ligilen aken nua qatuvi, mana ku sinikan," aya.

### **pinapapenetan nua Cemas tua caucau katua qatuvi.**

<sup>14</sup>qaqivuin nua Cemas a qatuvi: "uri ku patavungen sun tua su kinudan. amin sun sakamaya a uri makuyac tua kana qemuzimuzip anga a penulat. kemasi tucu uri sema tial anga sun a vaik, saka uri keman sun tua qipu a pate macai. <sup>15</sup>tisun katua vavayan uri masasan vilil mun; a taivilivilil nua vavayan katua su taivilivilil uri mavavutu uta. uri peteqen a su qulu nimadu; qau uri su kacen timadu a pi kuzkuzan," ayain.

<sup>16</sup>qaqivuin ti vavayan nua Cemas: "uri kilutud sun a kiqazal tua su tinavang katua su pualak. kumali ta uri

selapai sun aravac, uri natenglai sun aravac tua su cekel; saka uri kipalaing sun taimadu,” ayain.

<sup>17</sup>qaqivuin uta nua **Cemas** azua uqalai: “pai nakilaing sun tua kai nua su cekel, a keman tua vangal nua kasiw a inika ku siniselaing tu su kanen. manasika uri makuyac a kadunungan a masa su kinudan. saka tucu a i kacauan sun, uri mazelizeli sun tu qadavanga tua uri su sikavalut. <sup>18</sup>a su quma uri cuvuan nua laledede katua marka cemel. uri keman sun tua marka laceng a nacemuvuq i kavuavian. <sup>19</sup>nu mazengzeng sun, ki izua su kanen. uri mazeli sun a pate macai sun, sa su kicepeliw a mere qipu. ayatua qinati sun a sema qipu, manasika uri cemikel sun a mere qipu,” aya.

<sup>20</sup>papungadanan ni **adam**<sup>(1)</sup> a cekel a paka ti **iva**,<sup>(2)</sup> ayatua timadu namasan kina tua nacaucan anga i kacauan a mapulat. <sup>21</sup>seman kava a **Cemas** tua qalic nua qemuzimuzip, sa pakavan tai **adam** katua cekel.

### sauin i idin ti adam kati iva.

<sup>22</sup>ka vilil anga, qivu a **Cemas**: “azua caucau namayanga tanuiten a macaqu a papartimali tua nanguaq katua nakuya; saka uri nakuya uta nu keman anan tiamadu tua vangal nua kasiw a sikavalualut sa valut a pate palalaut,” aya. <sup>23</sup>pai sauin anga timadu nua **Cemas** a kemasi i **idin**, sa pakasengsengani timadu tu qemuma tua kadunungan, a mavan a kinasizuan a qemati taimadu. <sup>24</sup>ka sinau anga nua **Cemas** azua caucau, pakizangan nua **Cemas** tua kirubim<sup>(3)</sup> katua maru sapui a takit a penalingulan a kemareng, tua inika sika liadetan nua caucau tazua kasiw a venangavangal tua sika valualut.

(1) aicu a **adam** aya ngadan, caucau aya patarevan. (2) aicu a **iva** katua nasi aya kai, uri pasa mamaw a lingaw itua **hiniberayan**.

(3) **kirubim** nu aya, pinaka rukarekareng tua kakaizuan nua **Cemas**, saka sinipukelang ta garang nua **Cemas**.

**中華民國聖經公會**

行政院新聞局出版事業登記  
局版台業字第0713號

**Paiwan New Testament &  
Shorter Old Testament**

**PW63PT-227T-6,000 Copies**

**The Bible Society in the R.O.C. (TAIWAN)**

**Printed in TAIWAN**

**1993**